

Møre og Romsdal SV krev auka satsing på havnæringane

Ein oljealder på hell og aukande klimautfordringar tvingar oss til å få fart på det grønne skiftet. Næringslivet i Møre og Romsdal, med sine lange tradisjonar innanfor marine og maritime næringar, har alle føresetnader for å gå i spissen. Verdiskapinga langs kysten, og ikkje minst arbeidsplassane den representerer, er avhengig av at bedriftene greier å omstille seg til havbasert vekst for ei grøn framtid.

Mulegheitene er mange: fiske, også på djupt vatn, forskning, havbiologi, havvind, bølgekraft, offshore havbruk, nye miljøvennlige framdriftssystem for skip og ev. mineralutvinning på havbotnen. Som ei hjelp i arbeidet med innovasjon og omstilling i norske maritime bedrifter har Staten etablert programmet MAROFF.

Det skal bidra til «styrket omstillingsevne og forbedret samspill og kunnskapsoverføring mellom FoU-miljø og næringen.

Men det hjelper lite med gode analysar når oppfølginga i form av løyvingar ikkje står i stil med utfordringane og behova. Trongen for innovasjon i næringa er enorm, men mange sterke prosjekt kjem ikkje gjennom det tronge nålauget.

Løyvingane har i fleire år stått på staden kvil, og tiltaka står til dels i motstrid til kvarandre. Utviklingsprosjekt som kunne gitt verdfulle arbeidsplassar langs kysten, stoppar opp. Næringa ropar etter program som heng betre saman, og gjev kraftfulle svar på utfordringane dei står overfor.

Maritimt Forum Nordvest tek til orde for eit nytt program - Brukarstyrt Innovasjonsarena (BIA) Hav. BIA-prosjekt er allereie i gang i andre sektorar og er Forsking og utviklingsprosjekt (FoU) som tek utgangspunkt i bedriftene sine eigne strategiar. Møre og Romsdal SV har stor tru på at eit BIA-hav-program ville bidra til å skape nye arbeidsplassar i heile landet, og bli ein viktig del av det grønne skiftet i havnæringane.

Norske maritime bedrifter har vore i fremste rekke i omstilling og produktvikling på global basis. Dei røynslene som er vunne i utvikling av fiskeri- og petroleumsfarty og utstyr for havnæringane, vil vere det beste grunnlaget for å ta steget inn i den nye blå-grønne framtida. Men då må bedriftene få drahjelp til innovasjon frå det offentlege som monnar.

Møre og Romsdal SV ønskjer å vere med på det laget, og vil arbeide for å få fleirtal på Stortinget for auka løyvingar.

Møre og Romsdal SV vil:

- Øke satsinga på maritim næring
- Styrke BIA- HAV-programmet

Møre og Romsdal SV